

Percy Fitzpatrick

Jy ken dalk nie die naam sir **Percy Fitzpatrick** nie, maar as jy hoor dat hy die man is wat die boek *Jock of the Bushveld* geskryf het, sal jy seker dadelik die boek herken, want wie ken nie die storie van die dapper hond Jock nie? Dis sekerlik een van [Suid-Afrika](#) se bekendste [kinderboeke](#).

Sir Percy Fitzpatrick was 'n politikus, **entrepreneur**, joernalis en skrywer van Ierse afkoms. Hy is op 24 Julie 1862 in Kings William's Town in die destydse [Kaapkolonie](#) gebore. Hy was die oudste seun van twee Iere: James Coleman Fitzpatrick ('n regter) en Jenny Fitzgerald. ¹



Sy ouers het hom op 12-jarige ouderdom na 'n skool in Engeland, St. Gregory's College naby Bath, gestuur. Sy pa se gesondheid het egter begin agteruitgegaan, en hy moes na Suid-Afrika terugkeer. Hy het daarna onderskeidelik by St. Aidan's College in Grahamstad en by die South African College in [Kaapstad](#) skoolgegaan.

Sy pa is in 1880 oorlede, en Fitzpatrick moes **noodgedwonge** gaan werk het om sy ma en suster te onderhou. Hy het aanvanklik by 'n bank in Kaapstad gewerk, maar hy was van kleins af lief vir die natuur en buitelewe, en hy het blykbaar nie van die kantoorwerk gehou nie.

Die goudvelde van die destydse Oos-Transvaal het hom gelok. Hy is in 1884 daarheen en het daar onder meer as stoorman, **transportryer** en joernalis gewerk. ² As **transportryer** het hy goedere met 'n ossewa vanaf Lourenço Marques (vandag is dit Maputo) na Lydenburg en Barberton aangery, en hy het 'n liefde vir die Bosveld ontwikkel. Dit was ook juis op hierdie roete waar baie van Jock, 'n Staffordshire-bulterriër en die hoofkarakter van sy boek, se avonture afgespeel het. Fitzpatrick het saam met 'n vriend 'n transportonderneming begin en het ook later sy eie onderneming gehad.

Die roete wat hulle gevolg het, het destyds as die Ou Transportpad bekend gestaan en dateer terug na 1844 toe die [Voortrekkers](#) 'n praktiese roete tussen die Ohrigstad-gebied en die hawestad van Lourenço Marques gesoek het. Fitzpatrick se eerste ossewareis na Lourenço Marques het op 8 Mei 1885

afgeskop. Hy het blykbaar van al die transportdrywers die minste ervaring gehad. Een van die groeplede was Ted Sievewright, en hy was die eienaar van 'n hond genaamd Jess. Jess was Jock se ma.



Jess het 'n werpsel kleintjies in die veld naby 'n spruit (Samarhole) gehad, en Jock was blykbaar die kleinste van haar babas. Percy het hom as sy hond aangeneem, en Jock het die kampioen van die werpsel geword. Hul avonture in die Bosveld het uiteindelik aanleiding tot Fitzpatrick se bekende boek gegee.

Jock of the Bushveld

Fitzpatrick en Elizabeth Lilian Cubitt (1870-1923) is in 1886 getroud, en hulle het vier kinders gehad: Percy Nugent, Alan, Oliver en Cecily. Fitzpatrick het in die aande vir sy kinders slaapydstories vertel, en hy het gereeld vir hulle van sy avonture saam met Jock vertel.

Hulle was mal oor hierdie stories, en een van sy vriende was 'n skrywer en digter genaamd Rudyard Kipling. Hy het Fitzpatrick aangeraai om hierdie stories neer te skryf en dit as 'n boek uit te gee. Fitzpatrick het toe die stories neergeskryf en na 'n geskikte kunstenaar gesoek om die boek te illustreer. Hy het op Edmund Caldwell in Londen afgekom en hom na Suid-Afrika gebring om die Bosveld te besoek en sketse van die omgewing te maak.

Die boek het vir die eerste keer in 1907 verskyn, en dit was dadelik 'n reusesukses. Dit is in dieselfde jaar vier keer herdruk. Die boek is al in verskeie tale soos [Afrikaans](#), Nederlands, Frans, Xhosa en Zoeloe vertaal. 'n Fliëk is in 1986 van die boek gemaak, en 'n animasieweergawe is in 2011 vrygestel. ³



Skryf, sake en politiek

As joernalis het Fitzpatrick vir die koerant *Barborton Herald* geskryf en was later die redakteur van die *Gold Fields News* op Barborton. Sy skryftalent is ook glo later deur *The Star*-koerant in [Johannesburg](#) raakgesien, en hy het vir hulle

geskryf.

Hy het goeie kontakte opgebou toe hy deel van lord Randolph Churchill se **ekspedisie** na Masjonaland was. Hy het aantekeninge tydens hierdie tog gemaak en 'n boek, *Through Mashonaland with Pick and Pen*, daaroor geskryf.

Hy en die mynmagnaat Alfred Beit het goeie vriende geraak, en hy het vir Fitzpatrick in toposte in die mynbedryf aangestel. In 1892 was Fitzpatrick die hoof van die intelligensiedepartement van Herman Eckstein & Company (ook Cornerhouse genoem), en hy was ook op die **direksie** van die Kamer van Mynwese. Later was hy die president van die Kamer van Mynwese. Hy het deur die jare verskeie ondernemings begin, waarvan sommige om [mynbou](#) gesentreer was.

In daardie tyd was pres. [Paul Kruger](#) se regering in Transvaal aan bewind, en Fitzpatrick het hom beywer vir franchiseregte en burgerstatus vir buitelanders. Hy was in 1895 die sekretaris vir die Hervormingskomitee wat meer regte vir buitelanders wou hê.



Pres. Paul Kruger

Die Jameson-inval wat deur [Cecil John Rhodes](#) van stapel gestuur is, was 'n mislukte poging om 'n rebellie teen die Transvaalse regering te lei, en Fitzpatrick is ook daarvoor in hegtenis geneem, aangehou en op aanklagte van hoogverraad verhoor.



Cecil John Rhodes

Fitzpatrick het later die politiek betree en was 'n nieamptelike lid van die Transvaalse Wetgewende Raad. Hy het ook op die interkoloniale raad gedien wat vir die Suid-Afrikaanse [Spoorweë](#) verantwoordelik was. Hy was in 1907 'n lid van die Progressiewe Party en het sy eerste oorwinning in 'n politieke verkiesing behaal toe hy sir Richard Solomon, die leier van die Het Volk-National Association-bondgenootskap, in [Pretoria-Suid-Sentraal](#) verslaan het. Hy was 'n groot voorstander daarvan dat Suid-Afrika 'n **unie** moes word en was 'n lid van die Transvaalse afvaardiging na die Nasionale Konvensie in 1909.



Die arrestasie van Leander Starr Jameson.

Hy en generaal J.B.M. Hertzog het ook saam aan 'n ooreenkoms vir taalgelykheid gewerk. Hy het in 1920 uit die aktiewe politiek getree. Hy is twee keer deur die Britse regering met ridderskappe vereer. Hy is in 1902 vir sy dienste tydens die [Anglo-Boereoorlog](#) vereer, en ná [Uniewording](#) in 1910 het hy vir die tweede keer die Orde van St. Michael and St. George ontvang.

Tragedies

Daar was talle tragedies in sy lewe. Sy oudste seun, Percy Nugent, is in 1917 in die [Eerste Wêreldoorlog](#) in Frankryk tydens 'n **veldslag** oorlede. Fitzpatrick se vrou is in 1923 dood, en sy ander twee seuns het in 1927 binne 'n week van mekaar gesterf. Alan is in 'n ongeluk in Johannesburg oorlede, en Oliver het weens **tifus** in Mexiko omgekom. Slegs sy dogter het hom oorleef, en sy is in 1923 met Jack Niven getroud. Fitzpatrick self is op 69-jarige ouderdom in 1931 oorlede. Hy is in die Sondagsriviervallei by 'n uitkykpunt genaamd "The Lookout" begrawe. Sy vrou en twee van sy seuns is ook daar begrawe, en dit is as 'n nasionale monument verklaar.



Jock se gedenkteken in Mpumalanga.

Woordbank

direksie	'n Groep mense wat 'n onderneming bestuur.
ekspedisie	'n Lang, deeglik beplande reis.
entrepreneur	Iemand wat planne maak om nuwe ondernemings te begin.
noodgedwonge	Deur omstandighede genoodsaak.
pionier	Iemand wat belangrik is in die eerste ontwikkeling van iets.
unie	Die naam van 'n verbond of vereniging. Suid-Afrika was van 1910 tot 1961 'n unie.

tifus	Benaming vir besmetlike siektes wat met hoë koors, bewussynsverlies en delirium gepaardgaan.
transportryer	Iemand wat goedere per wa vervoer het.
veldslag	Geveg tussen vyandelike magte in die veld.
wapenstilstand	Staking van vyandelikhede tydens 'n oorlog; 'n skietstilstand.

Lees dié artikels om meer te leer

- [Percy Fitzpatrick se interessante lewe](#)
- [Meer oor die bekende boek *Jock of the Bushveld*](#)
- [Inligting oor sy seun, Nugent Fitzpatrick, se lewe en afsterwe](#)

Kyk dié video's om meer te wete te kom

Jock of the Bushveld word voorgelees

Die Jameson-inval

Kyk hoe die animasierolprent gemaak is